



REPUBLIKA E SHQIPËRISË  
KOMISIONI QENDROR I ZGJEDHJEVE

KOMISIONERI SHTETËROR I ZGJEDHJEVE

Data: 11 Nëntor 2021

Nr. 468

**VENDIM**

Komisioneri Shtetëror i Zgjedhjeve, në datën 21.09.2021 në përmbushje të vendimit nr. 107, datë 26.7.2021, të Komisionit të Ankimimeve dhe Sanksioneve pasi riçeli hetimin administrativ të çështjes që u përket:

**Kërkues:** Organizata “Qëndresa Qytetare”

**Ndaj:** Zj. Kledina Skëndo  
Bashkisë Tiranë  
Bibliotekës “Misto Treska”  
Partisë Socialiste e Shqipërisë

**Objekti i ankimit:** Për rishqyrtimin administrativ të shkeljes së dispozitave të Kodit Zgjedhor dhe vendimit nr. 9 datë 24.12.2020, të Komisionit Rregullator, në lidhje me zhvillimin e fushatës elektorale në ambientet e bibliotekës “Misto Treska”, me pjesëmarrjen e kandidatit për deputet zj. Kledina Skëndo

**Baza ligjore:** Neni 19, pika 1, shkronjat “dh”, “f ” dhe “n”, e pika 2, dhe neni 91, të ligjit nr. 10019, 29.12.2008, “Kodi Zgjedhor i Republikës së Shqipërisë”, të ndryshuar.

**I. Rrethanat e faktit**



Data: 11 Nëntor 2021  
Nr. 468

Për rishqyrtimin administrativ të shkeljes së dispozitave të Kodit Zgjedhor dhe vendimit nr. 9 datë 24.12.2020, të Komisionit Rregullator, në lidhje me zhvillimin e fushatës elektorale në ambientet e bibliotekës “Misto Treska”, me pjesëmarrjen e kandidatit për deputet zj. Kledina Skëndo

- Pranë Komisionit Qendror të Zgjedhjeve, në portalin e denoncimeve, në datën 19.03.2021, është raportuar nga organizata “Qëndresa Qytetare” denoncimi me nr. ID të gjeneruar nga sistemi 2368, ndaj kandidatëve për deputetë të subjektit Partia Socialiste e Shqipërisë, zj. Kledina Skëndo dhe z. Alqi Bllako dhe Bashkisë Tiranë. Denoncuesi pretendon se në shkelje të nenit 91 të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar dhe vendimit nr. 9 datë 24.12.2020 të Komisionit Rregullator, zj. Kledina Skëndo, ditën e enjte më datë 18 Mars 2021, në ambientet e bibliotekës së qytetit të Tiranës, “Misto Treska”, ka zhvilluar takim me mbështetësit në prani të Kryetarit të Bashkisë Tiranë, z. Erion Veliaj. Gjithashtu në datën 11 Mars në ambientet e të njëjtës bibliotekë, kandidati Alqi Bllako, zhvilloi takim me mbështetësit e Partisë Socialiste. Organizata “Qëndresa Qytetare” denoncon shkeljen e nenit 91, pika 1, të Kodit Zgjedhor dhe vendimit nr. 9/2020 të Komisionit Rregullator, neni 3, pika “c”, ku në dispozicion të kandidatëve pretendon se janë vendosur asetet e publike konkretisht ambientet e Bibliotekës “Misto Treska”. Në cilësinë e provës “Qëndresa Qytetare” ka vendosur në dispozicion dy link-e të rrjetit social “Facebook” në të cilin sipas saj, gjenden provat e këtij aktiviteti.

Linku: <https://www.facebook.com/ErionVeliaj/videos/475327973499543/>

Linku: <https://www.facebook.com/alqibllako/photos/pcb.249855103500745/249854930167429/>

- Referuar denoncimit të mësipërm, Komisioneri Shtetëror i Zgjedhjeve me shkresën nr. 3503 prot., datë 09.04.2021, i ka kërkuar, Bashkisë Tiranë informacion sqarues në lidhje me zhvillimin e këtyre aktiviteteve, të kandidatëve për deputetë zj. Kledina Skëndo dhe z. Alqi Bllako, në ambientet e bibliotekës së qytetit të Tiranës.
- Duke qenë se Bashkia Tiranë, brenda afateve të përcaktuara ligjore, nuk i ktheu përgjigje kërkesës tonë, kushtëzuar nga afati nënligjor përcaktuar në vendimin nr. 9/2021 të Komisionit Rregullator, Komisioneri Shtetëror i Zgjedhjeve vendosi të shtyjë hetimin administrativ deri në një përgjigje të Bashkisë Tiranë për çështjen në fjalë. Me vendimin nr. 361, datë 19.05.2021, Komisioneri Shtetëror i Zgjedhjeve vendosi zgjatjen e afatit të shqyrtimit administrativ të denoncimit të Organizatës “Qëndresa Qytetare”, për shkelje të parashikuara në Kodin Zgjedhor dhe vendimin nr. 9 datë 24.12.2020, të Komisionit Rregullator në Komisionin Qendror të Zgjedhjeve.
- Me shkresën nr. 1444/1 prot., datë 14.05.2021, protokolluar me tonën me nr. 5371 prot., datë 19.05.2021, Administratorja e njësisë administrative nr. 10, zj. Karolina Kostallari, bën me dije se” *“Në bibliotekën “Misto Treska”, e cila ndodhet në administrimin e kësaj njësie, zhvillon shpesh evenimente dhe aktivitete të karakterit social, kulturor dhe informues për banorët e Njësisë dhe më gjerë, por në asnjë rast nën menaxhimin dhe monitorimin e tyre nuk është zhvilluar asnjë aktivitet i karakterit zgjedhor; kjo dhe në mbështetje të Vendimit të Këshillit Bashkiak Tiranë, Nr. 35, dt. 29.03.2018 “Bibliotekat e lagjeve si qendra multifunksionale”.*



- Në përfundim të hetimit administrativ, Komisioneri Shtetëror i Zgjedhjeve, bazuar në vlerësimin e hollësishëm të çdo prove veçmas dhe të gjitha provave së bashku paraqitur nga palët si dhe në rezultatin tërësor të hetimit administrativ, çmon se pretendimi i kallëzuesit, Organizata “Qëndresa Qytetare”, për shkelje të Kodit Zgjedhor dhe vendimit nr. 9, datë 24.12.2020 të Komisionit Rregullator nga ana e Bashkisë Tiranë, nëpërmjet vendosjes së aseteve publike në dispozicion të kandidatëve për deputetë zj. Kledina Skëndo dhe z. Alqi Bllako, është i pabazuar në prova dhe fakte. Në këto kushte, Komisioneri Shtetëror i Zgjedhjeve nëpërmjet vendimit nr. 424, datë 12.07.2021, vendosi: “Përfundimin e shqyrtimit administrativ të denoncimit ndaj bashkisë Tiranë, për arsye se nuk konstatohen elemente të shkeljes së dispozitave të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar dhe vendimit nr. 9, datë 24.12.2020 të Komisionit Rregullator në KQZ”.
- Kundër këtij vendimi, Organizata “Qëndresa Qytetare”, në datën 22.07.2021 ka paraqitur ankim, në Komisionin e Ankimimeve dhe Sanksioneve (KAS) i cili, me vendimin nr. 107, datë 26.07.2021, vendosi:
  1. Shfuqizimin e vendimit nr. 424, datë 12.07.2021 të Komisionerit Shtetëror të Zgjedhjeve.
  2. Riçeljen e hetimit administrativ të plotë e të gjithanshëm nga Komisioneri Shtetëror i Zgjedhjeve, në përputhje me Kodin Zgjedhor dhe Kodin e Procedurave Administrative.

## 2. Riçelja e hetimit administrativ

- Komisioneri Shtetëror i Zgjedhjeve, në respektim të vendimit të KAS nr. 107, datë 26.07.2021, ditën e premte, më datë 17.09.2021, ora 12:00, në përputhje me përcaktimet e nenit 47 dhe 87 të ligjit nr. 44/2015 “Kodi i Procedurave Administrative i Republikës së Shqipërisë”, në ambientet e Komisionit Qendror të Zgjedhjeve, riçeli hetimin administrativ të plotë e të gjithanshëm për të garantuar të drejtat e palëve në proces administrativ, duke zhvillua një seancë dëgjimore, në të cilën u thirrën: Organizata “Qëndresa Qytetare”, zj. Kledina Skëndo kandidat për deputet i subjektit zgjedhor “Partia Socialiste e Shqipërisë”, z. Alqi Bllako kandidat për deputet i subjektit zgjedhor “Partia Socialiste e Shqipërisë”, ”Bashkia Tiranë, përfaqësues të bibliotekës “Misto Treska” si dhe subjekti zgjedhor “Partia Socialiste e Shqipërisë”.
- Në seancën dëgjimore i pranishëm ishte përfaqësuesi i Organizatës “Qëndresa Qytetare” si dhe kandidati për deputet, zj. Kledina Skëndo. Palët e tjera nuk u paraqitën në seancë dëgjimore.



- Përfaqësuesi ligjor i Organizatës “Qëndresa Qytetare”, rikonfirmoi pretendimet e tij për përdorimin e bibliotekës “Misto Treska”, duke pretenduar se është shkelur haptazi Kodi Zgjedhor si dhe vendimi nr. 9, datë 24.12.2012, i Komisionit Rregullator, sipas të cilit ndalohet përdorimi i aseteve publike për aktivitete të fushatës elektorale. Sipas tij, bibliotekat e Tiranës është nën administrimin e bashkisë Tiranë dhe janë asete publike të administruara dhe në pronësi të Bashkisë Tiranë. Është provuar nëpërmjet pamjeve filmike dhe provave fotografike, të marra nga rrjeti social facebook, se kjo bibliotekë është vënë në dispozicion të kandidatit për deputet për kryerjen e aktivitetit elektorale.
- Në shpjegimet e dhënë në seancë dëgjimore, kandidati për deputet zj. Kledina Skëndo, depoziton parashtrimet pranë Komisionerit Shtetëror të Zgjedhjeve nëpërmjet së cilët deklaroi se, *“Gjatë gjithë periudhës që nga muaji janar i vitit 2021 dhe deri tani që jam pranë jush, kam zhvilluar dhe zhvilloj shumë aktivitete me karakter rinor, social dhe kulturor, duke marrë shkas nga pozicioni si aktiviste për të drejtat rinore. Për shkak të ngarkesës dhe kohës që ka kaluar, u njoha vetëm me anë të njoftimit lidhur me përmbajtjen dhe me datën e zhvillimit të këtij takimi. Sjell para jush faktin se ky takim është zhvilluar me nismë të Kryetarit të Bashkisë Tiranë, duke qenë se unë isha pjesëmarrëse në ekipin që përgatiti materialin, që ju drejtua konkursit për qytetin europian të rinisë, që për fatin tonë dhe falë punës shumë të madhe, Tirana u përzgjodh si fituese e këtij konkursi për vitin 2022. Ky takim kishte si qëllim shpalesjen e ideve në lidhje me planin e veprimit lidhur me zhvillimin e aktiviteteve dhe të veprimtarive në kuadër të realizimit të këtij qëllimi.”*
- Organizata “Qëndresa Qytetare” ka depozituar gjithashtu kërkesën me nr. 6174 prot., datë 29.07.2021, në të cilën ka paraqitur si provë shtesë, linkun e FB të ATSH-së:  
Link :[https://www.facebook.com/atch/live/?v=949198432555609&ref=watch\\_permalink](https://www.facebook.com/atch/live/?v=949198432555609&ref=watch_permalink)  
si dhe ka kërkuar zgjerimin e objektit të kallëzimit duke pretenduar edhe shkeljen e nenit 172 të Kodit Zgjedhor nga subjekti politik “Partia Socialiste” dhe shtimin e saj si palë të akuzuar në përputhje me nenin 172 të Kodit Zgjedhor.
- Komisioneri Shtetëror i Zgjedhjeve më datë 07.10.2021, zhvilloi seancë dëgjimore, në kuadër të riçeljes së hetimit administrativ. Gjatë seancës dëgjimore Komisioneri Shtetëror i Zgjedhjeve vendosi ndarjen e çështjeve për shkak se Organizata “Qëndresa Qytetare”, në lidhje me zhvillimin e aktivitetit elektorale të kandidatit për deputet z. Alqi Bllako, kërkoi ndryshimin e vendndodhjes së kryerjes së këtij aktiviteti nga biblioteka “Misto Treska, në bibliotekën “Moikom Zeqo”.



- Përfaqësuesi i Organizatës “Qëndresa Qytetare”, depozitoi provë shtesë një foto të kandidatës për deputete të Partisë Socialiste, zj. Kledina Skëndo, duke pretenduar se: *“Zj. Skëndo ndodhet në ambientet e bibliotekës “Misto Treska” dhe ka vendosur maskën me logon dhe sloganin e Partisë Socialiste. Kjo provë vesh elementin elektorale të takimit duke cituar dhe deklaratën e kryetarit të bashkisë në postimin e tij në facebook i cili thotë se “Kledina, Bora, Fredi dhe Eljo e shumë goca e çuna, fantastikë janë pjesë e skuadrës fituese të Tiranës, që e duan vendin dhe duan të punojnë për të. Të rinjtë janë e tashmja!”*

### 3. Analiza e fakteve dhe provave

- Komisioneri Shtetëror i Zgjedhjeve më datë 11.11.2021 zhvilloi seancën dëgjimore, ku të pranishëm ishin përfaqësues të Organizatës “Qëndresa Qytetare”. Palët e tjera nuk u paraqitën.
- Përfaqësuesi ligjor i Organizatës “Qëndresa Qytetare”, i qëndron pretendimeve të mëparshme.

Gjatë analizës së fakteve dhe provave të paraqitura, Komisioneri Shtetëror i Zgjedhjeve çmon se:

- Në kallëzimin e paraqitur nga Organizata “Qëndresa Qytetare”, ajo ç’ka i është vënë në dispozicion KQZ-së për fillimin e procedurës administrative ndaj Bashkisë Tiranë, janë vetëm dy linke në “FB” të cilat Komisioneri i ka konsideruar si indicie të mjaftueshme për të nisur hetimin administrativ. Përveç dy linkeve në “Facebook” të vëna në dispozicion bashkë me denoncimin, paditësi ka sjellë prova tjetër shtesë një foto të kandidatës për deputet zj. Kledina Skëndo, me pretendimin se ajo mban një maskë me logon e Partisë Socialiste.
- Komisioneri Shtetëror i Zgjedhjeve pasi analizoi deklaratimet e palëve në seancën dëgjimore si dhe pretendimet e kandidatës për deputete zj. Kledina Skëndo e cila pohonte se: *“Ky takim është zhvilluar me nismë të Kryetarit të Bashkisë Tiranë, duke qenë se unë isha pjesëmarrëse në ekipin që përgatiti materialin, që ju drejtua konkursit për qytetin evropian të rinisë, që për fatin tonë dhe falë punës shumë të madhe, Tirana u përzgjedh si fituese e këtij konkursi për vitin 2022. Ky takim kishte si qëllim shpalosjen e ideve në lidhje me planin e veprimtimit lidhur me zhvillimin e aktiviteteve dhe të veprimtarive në kuadër të realizimit të këtij qëllimi”,* vlerësoi se, aktiviteti është zhvilluar në ambientet e Bibliotekës “Misto Treska”, por nuk provohet të jetë aktivitet me natyrë elektorale. Kandidati për deputet i subjektit zgjedhor Partia Socialiste e Shqipërisë, ka qenë prezent por ky aktivitet nuk ka pasur karakter elektorale por i drejtohej konkursit për qytetin evropian të rinisë, sikurse pohon dhe kandidati për deputet.
- Në lidhje me provën e dytë në vënë në dispozicion nga seanca e kaluar është vështirë të konfirmohet se foto e kandidatit për deputet zj. Kledina Skëndo, lidhet me datën dhe vendin e zhvillimit të



aktivitetit. Për aq kohë sa ngelet dyshuese konsiderohet se nuk mund të merret në vlerësim nga ana e Komisionerit Shtetëror të Zgjedhjeve.

- Në këto kushte, nuk u arrit të provohej se veprimtaria e zhvilluar në bibliotekën “Misto Treska”, kishte qëllim zgjedhor, por ky takim është zhvilluar në kuadër të konkursit për qytetin europian të rinisë. Biblioteka është një aset publik nën administrimin e Bashkisë Tiranë, i cili mund të vihet në dispozicion të target grupeve të ndryshme për zhvillimin e aktiviteteve të natyrave të ndryshme, përveçse me natyrë elektorale, politike.

Për sa më sipër, veprimtaria e zhvilluar në bibliotekën “Misto Treska”, nuk përbën veprimtari të ndaluar në kuptim të Kodit Zgjedhor dhe vendimit nr. 9, datë 24.12.2020 të Komisionit Rregullator.

### **PËR KËTO ARSYE:**

Bazuar në nenin 19, pika 1, shkronjat “dh”, “f” dhe “n”, e pika 2, dhe neni 91, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar,

### **V E N D O S:**

1. Përfundimin e shqyrtimit administrativ të denoncimit ndaj kandidatit për deputet zj. Kledina Skëndo, Kryetarit të Bashkisë së Tiranës, subjektit zgjedhor “Partia Socialiste e Shqipërisë” dhe Administratorit të Njesisë Administrative.
2. Kundër këtij vendimi mund të bëhet ankim në Komisionin e Ankimimeve dhe Sanksioneve, brenda 30 (tridhjetë) ditëve nga hyrja e tij në fuqi.
3. Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.

**Komisioneri Shtetëror i Zgjedhjeve**

**Ilirjan CELIBASHI**

